

柯子答問

序柯夫子答問

門人黃若獻撰

門人黃若獻撰

師弟子答問。昉自孔門。而孟氏列之五教。世儒
祖述。莫盛於濂洛關閩。率有問答語錄。而延平
答問。則專授考亭者。獻嘗讀其書。未嘗不慨然
歎曰。嗟乎。是誠吾道管鑰也。今之人。往往束高
閣而已。此其故。維何。談玄遠者。指以平平。事曠
達者。斥爲鄙鄙。而恍惚欲窺吾道之門牆者。又
竊一超直入之說。曰。吾有欄柵。在於戲聖賢旣

遠繼軌迭興枯項茂有聞乃吾師希齋柯先生
以豪傑之才志聖賢之學嘉靖初登第授南曹
主領牒卽疏病歸彌勵素業於聲利泊如而貧
賤患難不隕穫也杜門四紀所著有宋史新編
史記考要等書爲海內傳誦晚復萃郡中諸生
三百輩而授之業諸生才鉅人人殊要皆慕古
之道而先生立赤幟以指麾羣迷不特講義之
醇醇而已或質所疑則隨叩而應多出昔人所
未發君子謂先生上接四儒之緒獨延平乎哉

獻未及門時雅切嚮往心既得拜先生東山之
麓童顏鶴髮正襟端坐蕭蕭如也雍雍如也問
發一二言別理道商略古今人物洞若觀火他
日侍坐盡舉前聞所未解者以問先生先生條
分縷析則積疑頓開先生有大造於諸生獻其
尤也同門彙編答問九十餘條欲刻與講義並
傳獻也不能無言獻惟聖賢之用心道而已不
得已而言以明道也凡先生所著莫非爲道計
而是編則博而歸之約闡明義理尤備云以解

心則性命之蘊彰矣以解學則邪正之路明矣
以解經傳則聖賢之秘顯矣以解史則往代之
人材治體亦可槩見矣折衷諸子羽翼六經道
是載之彼玄談曠論與夫一切權柄之說蓋異
日語也嗟夫道若日星千載共見披抉雲霧既
有執其機則因明求至我等庸無責耶謹序

隆慶四年庚午春二月初吉

柯子答問目錄

柯維騏

卷之一

心解

卷之二

學解

卷之三

經解
上

卷之四

經解
下

卷之五

傳解

卷之六

史解

柯子答問卷之一

門人吳大揚類編

門人方文沂續編

不肖孫茂竹校正

心解

吳大揚問古人以誠敬爲入門踐履爲實地
二者果以求道乎抑尚有其要乎今之年
少者事於詞章年長者紛於家務均之爲心
累者如之何而可得乎道耶

曰學者求道固在於內而誠敬外而踐履然其要則在立志。志立則誠敬常存。踐履愈篤矣。聖門之訓不廢游藝。既能誠敬踐履以餘力玩弄詞章。非游藝而何。人之一心。酬應萬事。家中庶務處之不欺其心。卽爲誠敬。不乖於義。卽爲踐履。詞章家務二者。所謂不患妨功。只患奪志也。方文沂問其實之心。謂誠嚴肅之心。謂敬。易乾言誠。坤言敬。不相兼也。伊川在舟中曰。心存誠敬者何。

曰誠與敬義雖各異所資以約情定性則同故
經傳言誠不言敬言敬不言誠如乾之閑邪卽
坤之直內何分別之有大抵誠敬不相離程子
嘗云誠然後能敬未及誠時却須敬而後能誠
故兼言之也

劉獻策問周子以寂然不動言誠朱子以真
實無妄言誠何以不同

曰周子之學得於易易曰無思也無爲也寂然
不動感而遂通天下之故非天下至神其孰能

與於此故周子曰寂然不動者誠也感而遂通
者神也究其說則寂然不動永無思無爲而言
所謂無欲者此也所謂無妄者此也周子嘗解
易無妄曰妄復則無妄矣無妄則誠矣程子亦
解易無妄曰無妄者至誠也朱子謂真實無妄
蓋本於此

陳觀海問恭敬二字孔子分而言孟子則合
而言如何

曰恭在容敬在心故孔子於君處於執事分而

言之心敬斯容無不恭苟敬不存則僞恭而已
故孟子於交際幣帛合而言之

鄭光井問春秋人物如吳季子掛劍事嘗謂
克此一念卽孟子所謂不失赤子之心歟

曰然蓋能存其良心故能輕視外物掛劍特其
小耳至於千乘之國棄如敝屣世之人嗜寶貨
與貪位慕祿者皆喪其良心也

黃陽問明道定性在於大公順應而戒其私
智他日又曰學者須先識仁識得此理以誠

敬存之不須防檢不須窮索反身而誠乃爲
大樂陽意仁性中物誠敬存而不懈自無私
智馴至於樂而性定矣二說似相發明

曰程子定性存仁二說固相發明亦可見求道
次第設求定性茫然無依據惟識仁而存之則
與定性同歸程子又嘗曰仁者心之生道敬者
心之所以生也此足以發明識仁而存之說

林淵問孟子嘗論人之良心發見於平旦乃
又曰鷄鳴而起孳孳爲利黜之徒也則良心

安在哉夫農工商賈皆孳孳爲利豈亦蹠之徒歟不然必別有所指矣

曰良心見於平旦者常也鷄鳴而起孳孳爲利喪良心者失其常也彼農工商賈各執其業以營其生豈不孳孳爲利然農之所得者已之力工之所得者已之技商賈之所得者已之贏無害於義則無害於良心矣故子貢貨殖樊遲問稼圃仲尼特以非士之所當爲而未嘗以其事之不可爲也若夫貪冒之夫圖利喜賄曾不顧

義理自閭井細氓以至士大夫上下交征惟日不足夜氣所存之良心特喪無餘孟氏謂蹠之徒殆若人耶夫人之所以異於禽獸者此良心也所以異於盜蹠者亦此良心也細氓無論矣士大夫乃甘爲禽獸盜蹠而不耻可怪哉

林兆箕問程子曰善惡皆天理王陽明先生亦曰善惡只是一物夫善惡兩端如水炭然卽如二公之說則荀卿所謂性惡揚雄所謂善惡混亦未可非也

曰程子言天下善惡皆天理又言天理中物須有善惡蓋指氣質之性也程子他日論性發明尤悉曰人生氣稟理有善惡然不是性中原有此兩物相對而生也如就下皆水也有流而至海終無所污有流而未遠固已漸濁有出而甚遠方有所濁清濁雖不同不可以濁者不爲水也澄治而使之清却是元初水此理天命也順而循之則道也循此而脩之各得其分則教也王周子謂性者剛柔善惡中而已矣卽此說也王

陽明言善惡只是一物不爲無據彼謂性惡與善惡混者可見其非矣

黃鯉問自古聖賢皆以主靜爲要鯉也從事而未能一日讀易至憧憧往來朋從爾思始悟思慮之相尋無間猶朋類之相從不已此心所由以不靜也意宜除去思慮不知其法何如

曰思慮與主靜自不相妨苟思慮得其正則無私欲之擾雖動亦靜也夫思慮皆由於心心之

神明豈與枯木死灰比而儒者爲學亦豈如佛氏忘其心無所用哉蓋萬物之理吾不可以不窮古人之訓吾不可以不繹君臣父子夫婦長幼朋友有常有變吾不可以不酌其宜故書曰思曰睿又曰弗慮胡獲苟思非所當思慮非所當慮是存養之功未至能主敬焉有此病乎若仲尼繫易反朋從爾思而曰天下何思何慮乃至聖地位非可易窺程子所以戒謝顯道也黃若獻問孟子曰學問之道無他求其放心

而已矣宋儒張南軒乃謂學所以收放心而
存良心其旨同與

曰心卽性也學以明其理而實踐之則放心歛
而恒性存矣孟子之意重在求放心張南軒之
意則重在學互相發也然有要焉程子曰敬者
聖學所以成始而成終也

俞維守問胡五峰曰天理人欲同行異情同
體其用朱子以同體其用爲非他日朱子釋
程子善惡皆天理謂放火殺人至惡若把火

炊飯或殺所當殺並不是天理又云道理有
面有背順之則是逆之則非有此理則有此
惡故皆謂天理此說與胡氏奚殊也竊疑之
曰胡五峰謂天理者對人欲而言然天理翻而
爲人欲其本固同譬如貨財本資以濟衆乃因
以剥民又如女婦本資以興家乃因以亡國不
可以觀天理人欲同體而異用乎程子謂天理
者指物理而言蓋善固天理而惡不可謂非天
理譬如飛鳶旣翔于太清乃競于臭腐又如遊

魚既潛于深淵乃貪于芳餌斯不可以觀善惡
皆天理乎吾謂胡子之論與程子將無同何朱
子以爲非耶他日朱子釋程子善惡皆天理借
放火殺人面背順逆爲喻雖與程子稍別實與
胡子相符豈朱子前此未定之見與抑語錄出
於門人所記有誤與要之論議異同亦不必辨
學者察於善惡之幾求以存其心養其性斯諸
儒教人之意也詳見答林兆箕語中

柯子答問卷之一

柯子答問卷之二

學解

吳紹馨問周子太極圖張子西銘後世言理學者必稱焉或謂太極圖發明造化之原西銘揭示進爲之方竊疑圖之所載豈無進爲之方而西銘於造化之原容有所未及乎後之說者又有謂各就所重言之不知果然否曰太極圖言萬殊本於一理西銘言分殊由於理一其明造化者同太極圖言君子所以全乎

天西銘言君子所以事乎天其示進爲者又同
不可以太極圖明造化爲重西銘示進爲爲重
也然謂之進爲則可謂之進爲之方則不可太
極圖進爲之方則通書之無欲是已西銘進爲
之方則東銘之慎言動是已

鄭光昇問揚子雲知曆法又知曆理昇也嘗
玩始復之圖考四仲之命則曆理可求顧布
筭推步之學寔有未喻

曰曆自黃帝以來官有專職至後世術人人殊

揚子雲作太玄推其數以合於曆邵子稱其兼
知曆理然程子諸儒或謂其無益或謂其勞而
且拙則太玄不必作可也邵子曆法程子亦嘗
稱之至他日談論數學雖悟一倍法畢竟不復
省記則曆數不必精亦可也儒者當用力於道
德性命外此皆非孔孟之訓矣

又問鳳凰以聲召和龍馬以象洩秘神龜以
數顯治乃人爲萬物之靈士爲凡民之秀而
樂律象數之學鮮有知者不亦有媿於物耶

鳳凰龍馬神龜或聲合樂律或文協象數物
之瑞者也今太常司天所掌樂律象數率皆精
習世曾不與瑞物比而士弗之習亦豈以不如
物爲媿蓋生人之道至大區區技藝特問學之
餘耳若蜂蟻之君臣鴻鴈之兄弟睢鳩之配耦
鶴鳴而子和鶯鳴而友應士有一不如物乃可
媿矣

周天祚問邇者郡判劉公某奉委盤糧風塵
滿面因嘆曰吾面被塵一水可滌假令胸中

如是殆非水之所能滌也彼在仕途而自警
若是殆亦可以警學者乎欲滌胸中之塵如
何而可

曰物欲者穢心之塵也克復者滌心之水也湯
之盤銘卽滌心之義容有仕者學者之間哉但
仕者有勢力可獲餽遺故易耽於貨賄學者無
拘束易縱耳目故多耽於聲色爲欲不同其爲
心之穢均也苟自覺其穢則克復之功可施若
不覺其穢而日恣以自娛末如之何矣

王應期問宋儒程子朱子語道統者歸之矣
若國朝理學名臣錄所載十五人其間學
力之純克養之粹果有可以方之程朱否

曰自古傳道之統者匪獨道備於身而已蓋有
垂訓萬世之功焉孟軻之後千餘年有周程張
朱者出濂溪太極圖通書明道定性書異端辨
伊川易春秋二傳橫渠東西銘正蒙考亭綱目
及四書群經集註其羽翼經傳者實詳且盡故
語道統繼孟軻者必曰四儒非但程朱也我

明楊月湖輯理學名臣十五人繼作者又不乏人其正論粹養謂之得宋儒之理學則可謂之得宋儒之道統則不可何則著書立言以羽翼經傳者寡也

丘吉問士之所學出則立功處則立言言及鄉之利病動有司而濟斯人雖謂之立功可也昔今日所患莫大於兵食而徹桑有備以貽鄉人億萬年之福可弗講乎

曰先儒謂士不必有位行道爲功業但有以及

物卽爲功業賢所望於立言以福鄉人其意同也然須當事者有愛民之實又有虛受之心乃可否則言者不以爲越必以爲踈矣就使不然亦徒一時之計耳若廟堂能擇人而久任之庶幾足食足兵億萬年之計也

林炫章問孔子曰君子進德修業欲及時也又曰四五十無聞斯不足畏然衛武公年過九十作抑詩以自警而國人稱曰睿聖時果足限乎

曰中人之學以待積累苟非及時勉勵鮮能有成若衛武公九十造聖不可以常理論學者慎毋以藉口也然武公亦豈可法耶史記載武公弑兄篡國則有匪之頌與睿聖之謚乃出國人之訣豈可爲據仲尼刪詩存抑與淇澳及賓之物筵者取其詞焉耳矣

宋萬葉問 今制以文取士士無論得失奪志只如文字不着意則不工有意求工又似務巧言以悅人如先儒所謂俳優者不知如

何得於此心無累

曰士遵時制工舉業之文非悅人以求售也
蓋物有常止之處雖之制器然器以精爲止弗
精則非器文以工爲止弗工則非文有道之士
窮理居敬無一事之敢苟文詞之工乃其能事
心奚累焉夫人幼而洒掃應對長而負薪操耒
凡分所當爲者皆道矧爲文乎程子謂作文害
道比之俳優殆爲不知道者歟耶

馬龍圖問自古論學往往以動靜並言而程

子則曰纔說靜便入於禪氏之說何也

曰靜者體動者用體立而後用行求道者於動靜可偏廢乎程子戒學者說靜蓋靜知存養乃可否則類禪而空寂矣程子他日又嘆靜坐爲善學蓋就知存養者而言否則坐禪而入定矣合而論之求道者不可不靜而不可以徒靜存養之功則主敬而已

方夢奎問吾儒非從事修煉者鮮談佛老宋之張子程子皆有志孔氏之學何乃沉溺佛

老累年始悟其非耶或謂二氏之教與吾儒
有近似者不知其近似與其非似者何如

曰佛老誠與吾儒有近似者佛氏曰有物先天
地無形本寂寥能爲萬象主不逐四時凋與吾
儒所謂太極生兩儀兩儀生四象不近似乎老
氏曰虛而不屈動而愈出迎之不見其首隨之
不見其後與吾儒所謂動靜無端陰陽無始不
近似乎其言雖間相似其術則迥不同吾儒曰
盡心知性佛氏曰明心見性吾儒曰存心養性

老氏曰脩心煉性夫明心見性則以覺爲真機
其弊必至於絕欲棄知視吾儒惟精之旨豈同
乎脩心煉性則以退爲長策其弊必至於貪生
罔利視吾儒惟一之旨又豈同乎大抵老氏之
虛無佛氏之寂滅均之絕倫而遺世吾儒靜而
明通動而公溥歸於盡倫而經世其爲不同尤
章章者宜張程二儒先迷而後悟也

黃幼柏問朱子言天理苟明不須講學夫陸
子之學所以近於禪者正在於此竊疑朱子

此言非其本意

曰士之講學正所以明天理也設明天理而輟講學則天理有時而晦矣孔子至聖尚憂學之不講矧中人以下者乎朱子嘗對門人言世人陽慕講學而設心圖利故矯之曰天理苟明不須講學蓋有爲之言也

林庭薰問程子謂孟子才高學之無可依據人須學顏子之學則入聖爲近他日朱子答張敬夫論存養書引程子此言爲證然則舍

孟子而學顏子果爲不易之論與

曰顏子孟子竝命世大賢也孟子言爲學曰收
放心言養氣曰集義言事天曰存心養性其與
顏子不遷怒不貳過得善而服膺三月不違仁
未嘗不同學孟子亦豈無依據惟是顏子久伏
陋巷而涵養之功純孟子周流列國而用世之
念切此則不能同耳程子慮學者之不務內故
以顏子爲訓又嘗曰有顏子之道德必有孟子
之事功卽此意也朱子答張南軒論存養亦援

程子之說其說實出於周子所謂學顏子之所
學誠不易矣抑孟子之道傳於子思子思傳於
曾子曾子傳於孔子唐韓子欲人沿流溯源故
曰求觀聖人之道必自孟子始與宋儒之旨異
云

柯子答問卷之三

柯子答問卷之三

經解上

林萬祺問文王繫乾卦之辭曰元亨利貞朱
子本義謂大通而宜於正蓋宜於正則大通
也程子之傳則四德並重與仲尼文言意同
文言曰君子行此四德者故曰乾元亨利貞
朱子豈不知文言乎殆必有說

曰仲尼文言卽文王繫卦之旨欲世之君子體
乾而行四德耳朱子示占者而重於貞以屯隨

臨革無妄五卦之辭皆曰元亨利貞而坤卦亦曰元亨利牝馬之貞欲其一例也然易者變易也乾卦四德並重他卦獨重於貞亦何不可

林鑑問易孔子曰作易者其有憂患乎先儒黃四如謂此句易總腦處若然則六十四卦皆教人以處憂患也乃孔子但舉復謙復恒損益困井巽九卦何耶

曰文王演易於姜里中故仲尼云作易者有憂患他章又云易之興也其當殷之末世周之盛

德耶當文王與紂之事耶其言憂患之詳如此
文王所以處憂患者不過自履至巽九卦而已
按史記崇侯虎譖西伯於紂紂囚西伯於羑里
西伯之臣閔夭之徒求美女奇物善馬以獻紂
乃赦西伯賜之弓矢鉞鉞得專征伐曰譖西伯
者崇侯虎也西伯歸三年伐崇而作豐邑閔夭
爲此謀殆亦巽以行權者耶黃四如謂憂患一
句爲易總腦乃推廣仲尼之意

黃若獻問乾坤易之蘊也乾象爲馬取其健

坤象爲牛取其順然也無乾亦有馬象離無
坤亦有牛象何與聖人助陽抑陰故於復憐
憐馬惟欲陽之長也至乾之首乃曰潛龍勿
用於婚媾憐馬惟恐陰之盛也至坤宜益履
其戒而曰龍戰于野其血玄黃乃並辭稱之
安在其助陽抑陰也

曰文王作卦辭周公作爻辭仲尼作彖傳及繫
辭說卦諸傳三聖雖發明伏羲之蘊禎取象不
能皆同說卦之傳曰乾爲馬坤爲牛乾爻之象

則曰龍不曰馬坤卦之象則曰馬不曰牛且馬
牛二象不但見於屯離而渙遯萃睽明夷大畜
諸卦皆有之不必係於乾坤也說卦之傳又曰
震爲龍乾之爻取馬坎爲豕姤與大畜之爻取
馬離爲雉屯與旅之爻取馬巽爲雞中孚之爻
取馬兌爲羊大壯之爻取馬困爻取喻不但馬
牛二象爲然也夫仲尼後聖寧不嫌與前聖異
耶蓋說卦與繫卦繫爻其體各別況易者變易
之義胡可一例拘也至若乾之物六曰潛龍勿

用疑非助陽之詞。然一陽初長。當相時而後動。
示以勿用。爲陽謀也。謂非助陽可乎。坤之上六。
龍戰于野。疑非抑陰之辭。然六陰極盛。必遇
爭而後阻。示以龍戰。不爲陰謀也。謂非抑陰可
乎。

劉寅問易卦兼坎象者十有四。其屯師蒙訟
節井渙困蹇未濟皆與象合。若解既濟則脫
于險阻矣。雷而宴樂比而親附則非艱虞孤
危矣。乃亦有坎象何歟。

曰解有未盡則當早圖既濟不通其變則勢必
窮窮必亂雖宴樂矣陷罪伏于談笑雖親附矣
干戈起於蕭牆四者皆未可以晏然處也故聖
人竝取象于坎以示思患預防之意

鄭邦治問易泰之九二曰包荒用馮河不遐
遺朋亡得尚于中行程子朱子之說竝以中
行承上四者而言象辭乃曰包荒得尚于中
行何居

曰賢才用則世道泰故泰之初六與九二皆以

用人爲言九二包荒其凡也剛之過中者不廢
遠而無籠者不遺孤而無朋者不厄皆包荒之
事故曰包荒得尚乎中行

曾曰唯問易繫辭之十二章云形而上者謂
之道形而下者謂之器其第五章云一陰一
陽之謂道夫陰陽形而下者乃謂之道者何
五章又云繼之者善成之者性則皆陰陽所
爲也亦可謂之道否

曰一陰一陽之謂道一句兼道器而言蓋陰陽

器也所以爲陰陽者道也繼之者善成之者性
雖陰陽所爲亦道也道卽太極其在人則爲性
能盡其性則太極在我矣孟氏性善之說寔出
於此

林兆珂問易之爲道更四聖而始成而曰周
人之易者何也且其言皆天地陰陽之理微
乎微乎而傳者每以占爲言則易豈專爲卜
筮設耶

曰周禮春官太卜掌三易之法一曰連山二曰

歸藏三曰周易蓋夏之易曰連山殷之易曰歸
藏周之易乃文王繫卦周公繫爻故名周易是
時尚未有仲尼十翼也先儒賈氏謂夏殷易以
七八不變爲占周易以九六變者爲占則三易
皆爲卜筮而設朱子本義專主占不爲無據然
古者聖人教人卜筮以開物成務其道至大彼
太卜所掌之法特得其粗耳仲尼曰易有聖人
之道四焉以卜筮者尚其占其一也夫人心有
疑則卜筮無疑則否仲尼又曰君子居則觀其

象而玩其辭動則觀其變而玩其占斯學易之
法何止卜筮耶

方文所問邵子詩曰須探月窟方知物未躡
天根豈識人何謂天根月窟而是以盡人物
又曰三十六宮皆是春大易無三十六宮之
文不知何所指若就八卦而言則卦有陰陽
何謂皆春

因據邵子所傳六十四卦方位環布之圖考之
純陽者乾卦在午方而姤卦接於乾純陰者坤

卦在子方面復卦接於坤陽極於午而生於子
是陽根於復故曰天根陰極於子而生於午是
陰窟於姤故曰月窟陰陽相生而不已天地萬
物盡在範圍卽子分人與物蓋互文也三十六
宮蓋八卦之畫如其數又乾一疊至坤八亦如
其數又乾南坤北離東坎西震東北巽西南兌
東南艮西北四方相對皆九畫合四九亦如其
數陰中有陽陽中有陰生意無窮故曰皆春
以上解易

吳大揚問虞書放齊曰胤子朱啓明帝曰吁
監訟可乎夔曰虞賓在位群后德讓夫放齊
以監訟爲啓明不幾於諛堯乎朱監訟於堯
之訓德讓於舜之庭舜之德化乃盛於堯耶
然朱從親之令以天下與人物無逆詞且遜
順北面於受天下之人殆非爭辯不道忠信
者倫不可謂不啓明也而天下後世之論如
孟子曰丹朱之不肖何與

曰存敬畏於燕閒幽獨之地非賢者不能鑒矜

持於廣衆大廷之中。雖常人可勉。是謂升朱降
訟。蓋父子之間。察於燕閒幽獨。檢矣。彼謂啓明
非謂德讓。非謂乃特自廣衆大廷。勉者。觀
之。中使朱果化舜之德華心易行顯微一致。則
禹何惜其傲虐慢遊等事。爲舜戒耶。其失天子
就廣宥諒。或怨望爭辯。無人臣禮。是謂悖逆無
道。容但不肖而已乎。

王應期問武王有疾。太公召公曰。我其爲王
穰。下周公曰。未可以戚我先王。意蓋卻二公。

之下也。夫臣之愛君與弟之愛兄其心一也。當時二公從其郤公固得自以爲功矣。使郤之不從不知公將與二公同穆卜乎抑將以請命之事告於二公乎。

曰平治之朝群臣協和未嘗求勝已說而強人以必從也。當太公召公欲穆卜也。二公不以周公之郤爲非。設二公不聽其郤周公亦必不固執以爲是。或遂告以請命之事未可知也。周公之欲自爲功也意以已與三王祖孫一氣而弟

爲兄祈死實出至情庶幾易於感格而瘳武王之疾耳其曰未可以成我先王蓋推詞以對所謂言不必信者也

方洋問箕子洪範五事思若其一仲尼贊易乃曰無思者何

曰洪範之思賢而造於聖也故曰思作睿睿作聖易之無思聖之入於神也故曰無思也無爲也寂然不動感而遂通天下之故非天下至神其孰能與於此然必由思乃能無思學之序也

周天祚問蔡子註書金縢周公居東爲避居
乃朱子註東山詩爲東征或言朱子晚年自
覺其誤但未及改正不知然否

曰註釋之家各隨所據蔡子則據鄭氏朱子則
據孔氏若謂朱子晚年定論未及改正則諸儒
皆推尊朱子詩傳最精豈有未及改正之理且
蔡子書註與朱子異者頗多予不狎于不順蔡
云不順理之人朱子註孟子云不順理之君閔
月定四時成歲蔡云天迺地左旋一日一周日

體天亦運地一周朱子註詩十月之交云天左
旋於地日月右行於天雖若異同要皆有據豈
朱子亦未及改正耶竊疑蔡子之註或叅門人
之手故若此抵牾耳

茂竹問書錄秦誓於篇終邵子謂孔子知周
必爲秦其說然否但錄魯費誓者又不知何
旨

曰秦誓之詞有合於帝王之道故仲尼錄於書
之末周之爲秦兆已先見若謂仲尼預知殆未

必然但季札於歌秦知其能夏始大與邵子之
說亦非誣也其錄魯之費誓與詩錄魯頌意同
蓋伯禽爲周公賢胤僖公爲周公賢裔竝能舉
膺懲之法周公其不沒矣仲尼思慕周公故於
刪述每致意焉

以上解書

丘昌驚問商周有天下俱改正朔不相沿襲
商以建丑爲正月伊訓乃曰元祀十有二月
周以建子爲正月而建亥則十二月也詩十
月之交朱子以爲夏建亥之月皆不妨於正

朔耶古公商之諸侯周公述其處豳之俗曰
七月流火亦是夏時而於建子之月乃曰一
之日審發是以子月爲起數固不待武王開
國已重建子則又何耶

曰夏數得天商周兼用不廢商正雖建丑周正
雖建子而詩書所載皆仍夏時詎相妨也古公
居豳以建申爲七月亦是夏時而於建子之月
曰一之日則子月起數不獨周爲然也呂東萊
曰三正通於民俗尚矣周蓋舉而迭用之然周

開國正朔與夏時並行亦可見武王周公之達
孝不違先公之故俗也

朱校問詩兔罝之武夫漢廣行露野有死麇
之貞女說者推本文王之化然武夫之賢未
聞登之於朝貞女所防淫僻之徒而化弗及
焉其故何也

曰文王有麟趾之德斯有兔罝之武夫有開雉
之德斯有漢廣行露野有死麇之貞女然文王
不免遺兔罝之賢豈朝皆俊髦而位有限抑韜

其光耀而世固知乎至於貞女所防者皆文王之民乃猶有淫僻之行理固不可得而齊也夫天之道有陰陽人之類有善惡至治之世善人分數多惡人分數少設其人皆善無惡則上師之官不必設堯舜其猶病耶

黃若獻問司馬遷言古詩三千篇孔子刪之僅取三百之有合於義者而淫亂若鄭衛猶存何也或謂存以示戒則一二篇章足也焉用若彼之多也若巧笑唐棣等作或可以悟

禮或可以喻仁。而不會於新臺桑中之音乎。
聖人去此存彼。又何也。

曰。詩素以爲絢。可以喻禮。唐棣之華。可以喻仁。
此儒者講學之資也。若今仲尼所定者。取其關
於國家治亂。于以垂鑒戒焉。列國惟鄭衛多淫。
詩仲尼因而悉錄。庶見其俗之不媿。俗之不媿。
由政之不臧。故衛爲狄滅。東徙鄭終。春秋世困
弱。曾不得與齊魯秦晉比。治亂之效。不亦明甚
乎。其云三百篇合於義者。司馬遷之誤也。

鄭御問詩稱太王始翦商朱子註泰伯云太
王有翦商之志泰伯不從夫太王賢諸侯也
考其時乃在武丁朝諸侯之後有是心焉尚
可以稱賢乎無是心也則泰伯非以天下讓
不足爲至德矣

曰武王旣克商後之人追論開創之功歸之太
王蓋太王能擇賢傳國以啓王業也翦商之頌
正指傳國而言猶書云肇基王迹耳太王之心
豈敢逆料百年之後商王稔惡而子孫興王但

如文王三分天下有其二而道之濟於天下者
亦弘矣泰伯之心卽太王之心程明道謂泰伯
爲天下而三讓其公也伊川謂立文王則道
濟天下泰伯以天下之故而讓之也此說誠爲
至當其讓諸侯之國何害爲至德耶朱子註文
王至德并及泰伯欲其一例故不用程子之說
黃正望問季札有言小雅其周之衰乎王通
非之曰小雅惡乎衰其周之盛乎二說孰是
曰小雅有盛有衰蘇子瞻嘗斷季札知其衰未

知其盛王通知其盛未知其衰其說得矣

朱元良問鄭衛皆非正音乃孔子獨曰放鄭
聲孟子獨曰惡鄭聲之亂雅樂何耶朱子謂
鄭之淫詩多於衛且衛詩男悅女鄭詩女感
男衛猶有刺譏懲創之意鄭無復庶媿悔悟
之前以此別優劣其說果盡否

曰孔蓋皆惡鄭聲而不及衛朱子之說固然詳
而究之鄭之淫詩豈但如朱子所云而已叔子
問舊說以爲淫詩蓋叔者指所悅而言與仲也

意同雞鳴竊亦以爲淫詩蓋得鳥鴈而喜調之
不以奉舅姑不以供賓客乃夫婦自爲樂此何
俗哉解佩以贈所愛與贈芍藥意同然則鄭詩
共二十一章其不淫者惟緇衣太叔于田清人
羔裘出其東門五章已耳且衛詩自其姜至襄
公之母凡六婦人皆止於禮義其優於鄭豈不
章章乎

鄭光升問孟子曰王者之迹熄而詩亡朱傳
謂黍離降爲國風而雅亡蓋以王室下同列

國故孔子刪詩後卽其詩而名之曰王風物
非以其體制之異也林次厓以爲風自有風
之體雅自有雅之體竊觀黍離等篇體制曷
嘗有其俗講文義多以爲燕享不行而小雅
亡朝會不行而大雅亡則是黍離之外又別
有不載之詩疑於本音有矣

曰風雅頌之體不同朱子蓋兼二說一說里巷
之詞曰風朝廷之詞曰雅郊廟之詞曰頌一說
風有風之體雅有雅之體如次厓所云也然當

以里巷朝廷郊廟之說爲正朱子又註小雅云
正小雅燕享之樂也正大雅朝會之樂也以燕
享朝會不行解雅亡之義良是風雅頌之正者
周公所定黍離不列于雅而名曰王風非孔子
所定蓋季札觀樂爲之歌王乃孔子自衛反魯
以前事或當時之賢者所定而孔子因之耳

茂竹問合秦晉二詩觀之晉爲堯舊都其世
已遠而蟋蟀之節儉猶存秦爲文王舊都其
世尚邇而二南忠厚邇變爲無衣之強悍堯

之化果尚文王之化歟

曰堯之節儉至晉猶存固也若以秦習強悍疑
文王忠厚之衰雖先儒有是說吾不以爲然夫
無衣戰鬪文王武功之餘烈也其周室水木之
念同仇歡愛之情比之兇且腹心之夫無異獨
以強悍目之可乎載觀渭陽別舅念毋之不見
兼葭懷賢道阻而欲從晉秦風也不彷彿二南
之忠厚耶夫秦特其近者若化行江漢歷數百
年未嘗泯滅何者江漢之地其後爲楚楚之衰

也有遭讒被放而投身汨羅比干齊忠焉其亡
也有思楚遜秦而移家桃源晉陽比節焉以夷
狄之國猶有若人非漸染文王之遺化哉二聖
人之化勿以優劣論也

以上解詩

柯子答問卷之三